

Årsmelding for 2018

og

styret si melding

Selskapet si verksemd

Haugaland Kontrollutvalgssekretariat IKS blei stifta med verknad frå 01.01.05. Selskapet utgjer eit interkommunalt samarbeid mellom 10 kommunar på Haugalandet, og skal ivareta funksjonen som sekretariat for kontrollutvala for eigarane.

Deltakarkommunane er Bokn, Etne, Haugesund, Karmøy, Sauda, Suldal, Sveio, Tysvær, Utsira og Vindafjord. Kommunane hadde totalt 118.594 innbyggjarar pr. 01.01.18. Kontora ligg i Tysvær rådhus, Aksdal, medan møta i kontrollutvala blir halde i rådhusa ute i kommunane.

Selskapet utførar sekretariatstenester som omfattar oppgåver som saksførebuing, protokollføring og iverksetjing av vedtak i kontrollutvala.

Året 2018 har vore prega av ordinær drift, der selskapet har bistått kontrollutvala med å ivareta sin tilsynsfunksjon i kommunane. Sekretariatet har gjennomført totalt 46 (47) kontrollutvalsmøte og saksførebudd sakshandsaminga av 267 (273) saker i 2018. Av desse har 53 (48) gått til vidare handsaming i kommunestyra. Talet på saker varierer frå 3 til 8 saker i dei ulike kommunane.

I selskapet har det vore fire styremøte og eit representantskapsmøte. Styret har handsama 23 (22) saker, der fire saker er sendt eller skal sendast vidare med innstilling. På personellsida har det vore inga endringar. Selskapet har sine midlar på driftskonto, kapitalkonto og på lovpålagt skattetrekkskonto.

Selskapet har i sin strategiplan mål å vere synlege i kommunane og vere oppdaterte. Dette for å kunne gjere kontrollutvala til eit organ som kjem med innspel i utvalte saker. I 2018 har det vore særleg fokus på den nye kommunelova og innføring av ny personvernforordning. Dagleg leiar har møtt som observatør på representantskapsmøte i interkommunale selskap og som varamedlem til styret for Norges Kommunerevisorforbund (NKRF).

For å kunne samordne arbeidet til utvala med staten sitt tilsynsarbeid i kommunane, har sekretariatet samarbeid med fylkesmannen i Rogaland. Det gjeld særleg til forvaltningsrevisjonsarbeidet, slik at ein kan dra vekslar på, og byggje på kvarandres arbeid, i staden for å undersøke same tenesteområde innan same tidsrom.

Framhald av drift

Verksemda er basert på eit gjensidig samarbeid med og mellom eigarane om sekretariat-funksjonen for kontrollutvala i avtale frå 2004. Det er inga indikasjonar på lovendingar som skulle seie at grunnlaget for selskapet skal falle bort.

Kommunelova krev at sekretariata skal ha si sjølvstende, dvs. ikkje vere underlagt rådmann eller revisor. Ei samanslåing av kommunar vil kunne få verknad for drifta, men det er pr. i dag inga planar om dette. Selskapet har stabilitet i arbeidsstokk, eigenkapitalen er god og rekneskapen viser overskot.

Med dette som utgangspunkt meiner styret at vilkåra for framhald av drift av selskapet er til stades.

Resultat og utvikling

Selskapet skal i tråd med selskapsavtalen drivast i balanse, slik at inntektene frå kommunane dekkjar kostnadene. Rekneskapen for 2018 viser ein omsetnad på kr 2.018.900. I 2018 har drifta resultert i eit driftsoverskot på kr 62 678 og eit **positivt årsresultat på kr 65 327**. Lønnskostnadene og driftskostnadene blei litt lågare enn budsjettert. Sekretariatet utførar rekneskapsføring og lønnskjøring sjølv. Det gjer at ein har god innsikt i selskapet sin økonomiske situasjon til ein kvar tid.

Styret gjer framlegg at overskotet vert tilført eigenkapitalen. IKSet er eit lite selskap og er sårbar for endringar i rammevilkår og arbeidsstokk. Det er såleis viktig å ha reservar tilgjengeleg. Ved å kunne sette av midlar vil selskapet bli meir robust i sin daglege drift, samstundes som selskapet blir meir likvid.

Selskapet har i 2018 ikkje delteke i eller gjennomført forskings- og utviklingsprosjekt.

Arbeidsmiljø

Selskapet har eit godt arbeidsmiljø. Sjukefråveret har som tidlegare år vore lågt (0,9 %). Det har ikkje vore nokon skadar eller ulykker. Selskapet har hatt fokus på forhold knytte til helse, miljø og tryggleik. Selskapet har samarbeidsavtale med NAV om inkluderande arbeidsliv.

Som tidlegare år har styret ein positiv haldning til kompetanseoppbygging i selskapet. Styret meiner det er viktig for å halde på dyktige medarbeidarar og det har positive verknader for arbeidsmiljøet. Sekretariatet har i 2018 delteke på konferansar i regi av NKRF og Forum for kontroll og tilsyn i februar og juni. I august var sekretariatet vertskap for nettverksmøtet for Agder, Haugalandet og Rogaland. Dagleg leiar og rådgjevar deltok også på Vestlandssamlinga for kontrollutvalssekretariat på Flesland i oktober.

Likestilling

Selskapet har to tilsette, ei kvinne og ein mann. Styret i selskapet er sett saman av to kvinner og ein mann. Det er ikkje sett i verk spesielle likestillingstiltak. Selskapet legg vekt på likebehandling mellom kjønna i sin verksemd og styret meiner denne målsettinga er oppfylt.

Ytre miljø

Selskapet har ikkje verksemd som forureinar utover reiseaktivitet knytte til arbeidet i eigarkommunane. Selskapet sitt hovudkontor er lagt til Aksdal i Tysvær kommune, som geografisk ligg om lag midt i selskapet sitt virkeområde.

Avslutning

Som sekretariat for kontrollutvala er selskapet avhengig av eit nært og godt samarbeid med kommunestyra og administrasjonen i kommunane og revisjonsselskapa. Styret vil takka for samarbeidet som har vore i året som har gått.

På denne måten kan Haugaland Kontrollutvalgssekretariat IKS på sin måte vere med på å få ein velfungerande forvaltning og skape størst mogleg tillit til kommunane som forvaltningsorgan, til beste for kommunane og den enkelte innbyggjar.


Aksdal, 20.02.19



Astri Furumo
styreleiar



for **Simon Næsse**
nestleiar



Siv Bente Stople Østbø
styremedlem



Toril Hallsjø
dagleg leiar